

李文忠公奏稿

李文忠公奏稿

卷之七十二目錄

巡閱海軍竣事摺

光緒十七年五月初五日

煙臺膠州添築礮臺片

光緒十七年五月初五日

籌辦關東鐵路摺

光緒十七年五月二十四日

請添威海大連灣水雷摺

光緒十七年七月初二日

威海添礮籌費片

光緒十七年七月初二日

續收各省賑捐摺

光緒十七年七月初二日

再請優卹吳毓蘭片

光緒十七年七月初二日

荒地旗產升科摺

光緒十七年七月二十二日

威海添建學堂片

光緒十七年七月二十二日

曹克忠起病片

光緒十七年七月二十二日

郭嵩燾請付史館摺

光緒十七年七月二十二日

電報洋教習請獎片

光緒十七年七月二十二日

北洋電綫報銷摺

光緒十七年七月二十八日

請籌還張曜洋債摺

光緒十七年七月二十八日

覆奏停購船械裁減勇營摺

光緒十七年八月初八日

史克寬請開復片

光緒十七年八月初八日

海防練軍請銷摺

光緒十七年八月十九日

吳毓芬請卹片

光緒十七年八月十九日

奏明購買鋤鋼機器水腳片

光緒十七年八月二十七日

喜昌請建祠片

光緒十七年八月二十七日

李文忠公奏稿卷七十二

全集一之七十二

桐城吳汝綸編錄

巡閱海軍竣事摺

光緒十七年五月初五日

奏爲會同校閱海軍並查勘各海口臺陽工程事竣恭摺陳仰

聖鑒事竊北洋海軍自光緒十四年成軍以後現屆三年係第一

次校閱之期特蒙

簡派臣鴻章臣曜認真會校當將起程日期先後各奏明在案臣

鴻章卽於四月十六日率同水陸營務處直隸臬司周馥津海關

道劉汝翼等由大沽乘輪出海北洋海軍提督丁汝昌統率所部

定遠鎮遠濟遠致遠靖遠經遠來遠超勇揚威平遠康濟威遠廣

甲各艦及南洋統領前帶春鎮總兵郭寶昌所帶之寶泰南琛開

濟鏡清南瑞保民六艘隨同放洋十七日駛抵旅順臣曜先期行
抵煙臺亦於是日渡海會齊十八日校閱四川提督宋慶所部毅
軍八營演習德國陸操日臻純熟步武鎗法一律整齊旋閱記名
提督黃仕林總兵張光前所部親慶六營兼習英德操法亦稱精
練各軍演放鎗礮有準十九日查看新建大石船塢全塢皆用大
塊條石壘以外洋塞們德上塢外大石澳周圍泊岸俱用條石壘
砌西面攔潮壩與南面泊岸相連並極堅固塢傍設機器廠庫十
四座大小電燈四十六座建鐵碼頭造大鐵道通連廠庫以便起
卸轉運物料澳東建小石船塢以便修理雷艇駁船其工程之艱
鉅布置之詳密臣鴻章前於工竣驗收摺內已縷悉陳明今復逐
加履勘工段做法一一符合新授安肅道劉舍芳擬定善後章程
均極周妥此後北洋各艦隨時入塢修理無須遠借異國洵爲一

勞永逸之計連日閱看東西兩岸各礮臺其工程形勢十二年四月間

醇賢親王於巡閱北洋摺內曾經奏明歷經培修益增完固礮勇打靶亦能中的兩岸後路水陸師子藥各庫累年儲備頗極精詳旋派員考校魚雷水雷兩學堂該學堂爲雷學根本各口皆取資於此肄業各生多穎異勤謹之士弁兵等耳濡目染條對無遺尋在西岸試放水雷海水激立數十丈足稱守口利器二十一日開赴大連灣北洋各艦沿途分行布陣奇正相生進止有節夜以魚雷六艇試演泰西襲營陣法兵艦整備禦敵攻守並極靈捷頗具西法之妙次日駛往三山島調集各艦魚雷打靶能於駛行之際命中及遠旋以三鐵艦四快船六雷艇演放魚雷均能中靶南洋各艦隨同布陣打靶亦尙可觀連日察看河北鎮總兵劉盛休所

部銘軍新築和尚島老龍頭黃山徐家山各處礮臺六座仿照外洋新式曲折堅固後面兵房子藥庫純用條石砌成前牆厚培素土寬至十數丈足禦敵彈老龍頭一座轟山拓地以作臺基用力尤鉅二十五日開赴威海衛閱看候選道戴宗騫所部綏鞏軍新築南北兩岸各礮臺於原估北岸之北山嘴祭祀臺兩處外添築黃泥歲礮臺一座以便居中策應又於南岸龍廟嘴鹿角嘴兩處外添築趙北口大礮臺一座以便向外迎擊均得形勢做法堅固足與大連灣各臺相埒劉公島橫據口門勢甚扼要副將張文宣所帶護軍於島北新築地阱礮臺繫山通穴夾層隧道安設二十四生特後膛礮機器升降靈速非常能狙擊敵船而礮身蛩藏不受攻擊爲西國最新之式又於劉公島西接連黃島上設礮臺一座跨海通道工力尤艱嶺南相距七里之日島矗立水中亦設地

阱礮臺與南岸趙北嘴礮臺相爲犄角鎖鑰極爲謹嚴臣等詳察大連灣威海衛布置情形地勢臺工均甚得力惟訂購礮位尙未到齊後路營庫各工仍須隨時添設當飭劉盛休戴宗騫督率營勇加意工作期臻完善劉公島爲水師各艦奇樅上煤之所道員龔照璵創造大鐵碼頭用厚鐵板釘成方柱徑四五尺長五六丈中灌塞們德士凝結如石直入海底較之各處所設鐵碼頭工程尤鉅調閱綏遠八營陸操兼看洋鎗打靶中至九成以上旋派員考校劉公島水師學堂學生等日習風濤筋力堅定於幾何算學頗能默會貫通嗣調集各兵艦小隊登岸操演陸路鎗礮陣法精嚴快利旋轉如風爲各處洋操之冠旋令威遠敏捷廣甲操使風帆一律便捷是夜合操水師全軍萬礮齊發無稍參差西人縱觀亦皆稱羨二十九日開赴膠州次日由黑水洋抵澳詳閱形勢輪

船進口係向西行青島在北陳家島在南相距六里既進口轉向
北行坦島在東黃島在西相距七里澳內周圍百餘里可泊大隊
兵艦口門係屬灣形從東至北環山蔽海形勝天成實爲旅順威
海以南一大要隘臣等籌商辦法已於月片具陳五月初一日臣
曜卽於膠州登陸取道青州回省臣鴻章仍由海道於初二日北
駛煙臺調閱漢中鎮總兵孫金彪所部嵩武軍四營陸操整齊靈
變陣法純熟可稱勁旅初三日駛回大沽察看南北兩岸礮臺並
校閱署大沽協副將羅榮光記名總兵劉祺副將史濟源所帶各
營卽由輪車馳抵天津此行往返十有八日周歷海道三千餘里
惟煙臺至大沽途次午後驟遇颶風直至中夜船身傾側進水危
險殊常幸獲無恙此外所至俱值天氣晴明得以逐一履勘克期
竣事水陸將弁胼胝力作亦能各盡所長伏念中國創辦海軍實

惟

醇賢親王注意經營之舉臣鴻章前此隨同巡閱北洋各口曾蒙將布置情節於覆

命疏內詳細

上聞而於陸軍之不可輕裁船艇之尚須添置學堂之必應推廣尤三致意洵爲遠慮深謀其時英德四快船訂購未到大連灣威海衛亦未辦防今則兩處臺壘粗成移軍填紮北洋兵艦合計二十餘艘海軍一支規模略具將領頻年訓練遠涉重洋並能衽席風濤熟精技藝陸路各軍勤苦工操歷久不懈新築臺壘鑿山填海興作萬難悉資兵力旅順威海添設學堂諸生造詣多有成就各局仿造西洋棉花藥栗色藥後膛礮連珠礮各種大小子彈計數各艦操習之需實爲前此中國所未有綜核海軍戰備尙能日

異月新目前限於餉力未能擴充但就渤海門戶而論已有深固不搖之勢臣等忝膺疆寄其佐海軍臣鴻章職任北洋尤責無旁貸自經此次校閱之後惟當益加申儆以期日進精強庶無負醇賢親王歷年締造之苦心仰副

聖明慎重海防建威銷萌力圖自強之至意海軍各員弁頻年勤苦不無微勞容臣等查明按照海軍衙門奏定章程擇尤分別保獎以昭激勸所有會校海軍及查看各口臺陽工程緣由謹合詞恭摺由驛具陳伏乞

皇上聖鑒訓示謹
奏

煙臺膠州添築礮臺片

光緒十七年五月初五日

再膠州海澳寬深口門緊曲昔年英法兵船犯津皆在威海大連
灣停頓現在威大各口修築礮臺水師相依俱成海防重鎮若有
敵船遠來必求一深水船澳停駐之處至於乘隙登岸陸路內犯
之說尤可慮也是膠澳設防實爲要圖光緒十二年臣鴻章隨同
醇賢親王閱海圖論及膠州必應置守惟經費支絀擬俟威大事
竣起籌續辦此次臣等會同前往詳勘度形勢自應預爲經畫
未可再緩又煙臺爲北洋通商三口之一中國沿海南岸南自瓊
州北至營口俱已建置臺壘煙臺水深口寬尙無建置實不足以
壯聲威況威海旣爲海軍屯駐口岸煙臺相距百餘里係威防後
路不容一隙之疏或謂通商海口一二國啟衅不能擾累各國商
務而甲申法人犯甯波卽商岸也臣等查煙臺十里外僅有通伸

岡一臺距口門過遠雖置巨礮亦難遙擊惟歸岱山與崆峒之朶
兩島鼎峙海門天然關隘歸岱背山面海尤爲輪船進口必經之
路亟應先在歸岱築礮臺一座並於東南相連之玉帶山添築礮
臺一座以便策應之朶崆峒從緩添置似此則黑水洋迤北深水
船澳悉有守禦使敵船北來無可停泊之地渤海千餘里固若長
城矣惟海軍衙門既無款可撥戶部亦難另籌九仞一簣中墮堪
虞北洋爲

京畿門戶海防一日不密臣心一日不安現與臣曜籌計再四擬
將煙臺膠州口礮臺擇定基址酌量建築所需經費擬請將山東
海防捐截留作爲建築礮臺之費雖數目極微尙可分年興辦臣
曜仍當督飭司道隨時移緩就急務使告成有期其餘俟威海大
連灣工竣再行奏明接續籌辦所需布帛營隊擬就山東現有各

營抽撥毋庸添募以節經費是否有當謹合詞附片具陳伏乞
聖鑒訓示謹

奏

籌辦關東鐵路摺

光緒十七年五月二十四日

奏爲關東鐵路遊

旨次第籌辦各省奉撥鐵路經費請

飭先行解津濟用恭摺仰祈

聖鑒事竊關東鐵路前經臣等商海軍衙門選派員匠分赴關內

外度地估費酌擬辦法由該衙門會奏本年三月十三日欽奉

上諭派臣督辦一切事宜力小任重惴懼莫名臣復飭勘地熟手

從直境之林西鎮至山海關止劃爲第一段詳細複勘局繪分圖

呈候隨時指授遴派記名提督周蘭亭直隸候補道李樹棠爲官

路總辦住工督率分飭地方官妥爲照料現在由林西至山海關

相度之地業經插標釘樑派員查照時價公平議買飭直隸藩運

司將本年應撥銀五萬兩就近解津第爲數無多約計購地築路

訂料等項需費浩繁一經開工必須撥款源源應手斷不能稍有
停待此項奉撥經費部庫每年一百二十萬已據奏明按年照數
月款存儲當可指以應用惟部庫根本重地不妨稍緩支取須將
外省歲撥八十萬先行催解再隨時赴部庫請領昨准戶部將直
隸河南陝西山西四川山東湖北湖南江甯江蘇安徽浙江江西
廣東福建臺灣十六省應解鐵路經費酌定限期欠解處分奏准
通行飭遵各省自必如期籌解但部議限於五月以前解到一半
現將逾限尚未聞有起解之信部議令解交海軍衙門兌收再由
臣派員赴京請領展轉需時實恐緩不濟急擬請自本年起的凡各
省報解鐵路經費由海軍衙門暨臣處隨時查案咨催徑解天津
以應急需而免周折臣於驗收後即分咨戶部及總理海軍事務
衙門總理各國事務衙門查照每屆年終仍由臣將各省已解欠

解收目開單彙咨海軍衙門按照部章核明議奏似較直截至關
外奉省應行豫籌事宜臣前在大連灣晤商將軍臣裕祿已將大
概情形安晰籌議俟關內路工就緒再行次第商辦合併陳明所
有鐵路開辦及催收外省撥款各緣由恭摺由驛具陳是否有當
伏乞
皇上聖鑒訓示謹
奏

請添威海大連灣水雷摺

光緒十七年七月初二日

奏爲威海衛大連灣兩海口添設水雷三營酌照向章核定名額餉數恭摺仰祈

聖鑒事竊西洋新式水雷爲沿海守口利器能與該口礮臺互相控扼則敵船不易深入是以各國均以此爲海防要圖北洋如大沽北塘山海關旅順各海口節節設營專習以備不虞威海衛大連灣南北相望乃北洋第一重門戶海上有事首當敵衝自銘軍綏燾各軍移兵分紮勦建礮臺累歲經營已成重鎮該兩處口寬澳闊尤非相地扼要酌設雷營不足以資捍禦前因臺工繁鉅未暇兼營現將竣工不容再緩臣於此次會閱海軍之際督同銘軍統領河南河北鎮總兵劉盛休綏燾軍統領候補道戴宗鶴水陸營務處甘肅安肅道劉含芳等詳細勘度威海一處與劉公島隔

海對峙分南北兩口北口水寬四里餘南口則日營矗立中央左右復分兩口各寬五里是該處共有三口一片汪洋毫無攔阻除緩軍原有水雷勇一哨係爲護營之用仍循舊辦理外今尙須分設水雷三營大連灣一處口寬二十餘里口西之青泥窪西北之老龍頭東北之小孤山皆屬海灣衝要亦非分設水雷三營不敷布置雖雷營定章與陸營迥異每營員匠兵夫僅一百三十餘名餉數較少然通籌現時餉力驟添六營實有未逮惟有於威海先設二營一駐北口一駐日島之南於大連灣先設一營駐內口之柳樹屯暫行居中控馭以壯聲勢而顧要防其餘三營將來應如何分設仍視庫款之盈虛與防務之緩急再行相機核辦茲將先設之三營飭據該鎮道等查照旅順水雷營章程酌擬名額餉數詳經臣飭山海防支應局司道議覆前來查威海衛爲北洋海

軍根本重地大連灣爲旅順金州後路要口添布水雷最關緊要
昔年

醇賢親王巡閱海軍之時卽議創設雷營用意至爲深遠本年五
月臣等會閱海軍復奏奉

諭旨海口關係至要必須精益求精仍著切實講求認真經理等
因欽此

聖慮周詳曷勝欽服誠以善守者貴設險於重門善戰者先立身
於不敗若有礮臺而無水雷將何所恃以備緩急是威海大連灣
兩處雷營之設實今日刻不容緩之圖目前先設三營尤屬不能
再少該鎮道等所擬名額餉數係援照旅順水雷營向章量爲增
損名額雖有變更餉數實爲核減並飭教習水雷英員羅哲士參
以西洋各國規制斟酌變通期底於善計每營共設弁目兵匠人

等一百三十六員名月支薪糧公費柴草銀七百八十七兩有奇其考試加餉及常年操習應需購製雷電器具號衣旗幟暨一切活支款目難以預計自應查照大沽等處水雷營向章核實辦理此項雷營用款應卽照案在於北洋海軍經費內開支惟查海軍衙門奏定章程工需雜費內原定大沽等處水雷營及內河小輪船餉項歲需銀五萬六千兩聲明威海大連灣二處水雷營尙未設成經費不在此內現設三營內威海之北口一營大連灣之柳樹屯一營已飭該鎮道等挑募足額赴營操練所需月餉卽自光緒十七年七月初一日起支折由本年北洋海軍經費內設法勻撥俟年底估計經費時再咨由海軍衙門核辦其威海之南口一營尙未募齊俟成營後起支報部又該雷營操陣設伏威海大連灣兩處各需小火輪船一號應卽按照大沽守雷等船成案飭由

大沽水師船塢估造俟造成後核定餉數月案奏咨所有擬請添設威海衛大連灣水雷三營酌定名額餉數緣由除分咨總理海軍衙門及戶兵工部查照外理合繕列清單恭摺具陳伏乞皇上聖鑒再威海大連灣各水雷營事屬創設將來如有應行變通之處及一切未盡事宜自當隨時奏咨以期周妥合併聲明謹奏

謹將威海衛大連灣創設水雷營酌定每營員名餉數開列
清單恭呈

御覽

管帶一員月支銀五十兩

洋文幫帶一員月支銀二十八兩

武幫帶一員月支銀二十四兩

隊長五名各月支銀十三兩共銀六十五兩

雷目八名各月支銀九兩共銀七十二兩

管旗八名各月支銀五兩共銀四十兩

水衣雷兵七名一名七兩二名六兩四名五兩共銀三十九兩

雷兵七十二名分爲六隊每隊十二名內一等二名各月支銀四

兩二錢二等二名各月支銀三兩九錢三等四名各月支銀三兩

六錢新兵四名各月支銀三兩計一等兵十二名二等兵十二名三等兵二十四名新兵二十四名每月口糧銀二百五十五兩六錢

號令二名各月支銀六兩共銀十二兩

文案冊籍司事一員月支銀十四兩

雷庫官一員月支銀十六兩

水雷洋文學生二名各月支銀八兩共銀十六兩

棉藥庫兵二名各月支銀三兩九錢共銀七兩八錢

機器工匠四名一名十三兩一名七兩二名六兩共銀三十二兩

木匠四名一名六兩三名四兩共銀十八兩

正鐵匠二名各月支銀六兩共銀十二兩

副鐵匠二名各月支銀四兩共銀八兩

銅匠二名各月支銀四兩共銀八兩

油漆匠二名各月支銀四兩共銀八兩

長夫九名各月支銀二兩八錢共銀二十五兩二錢

全營油燭紙張公費月支銀二十兩

柴薪按全營一百三十六員名內除管帶幫帶文案司事學生工匠長夫不給外應按一百五名核算每名日支銀五釐四毫月共支銀十七兩一分

以上每營一百三十六員名共月支銀七百八十七兩六錢一分

威海添礮墩費片

光緒十七年七月初二日

再北洋沿海礮臺防營月支各項礮費數目前於光緒十二年四月奏准

敕部立案並將增減數目按季造冊咨部查照現在綏字輩字等軍所修山東威海衛礮臺工竣應需大礮於光緒十五六年先後由外洋分批購到計德國克鹿卜二十四生脫後膛鋼礮十尊二十一生脫後膛鋼礮二尊十五生脫後膛鋼礮四尊英國阿摩士莊廠後膛地阱鋼礮二尊業經一律置設應支礮費爲隨時操練修理必不可少之需查照

奏定章程二十四生脫後膛礮每尊月給銀十二兩二十一生脫十五生脫後膛礮每尊均各月給銀八兩惟地阱大礮一項機器氣缸輪齒繁多經理油擦修護各事較他礮費用尤多前因北洋

並無此種新礮定章時未經議及當經飭據軍械局員比照二十四生脫礮核實酌加每尊月給銀二十兩均自設畢之日分別起支以資操練而重利器其尙有前在西洋訂購未到礮位俟運齊配設完竣再照章辦理據委辦綏軍文應局直隸候補道張紹華詳請具

奏並請自光緒十六年四月起截至本年六月底止將發過各臺礮費銀兩照章附入綏軍第四案造銷等情前來臣覆查無異除分咨各部查照外理合附片陳明伏乞

聖鑒敕部立案謹
奏

續收各省賑捐摺

光緒十七年七月初二日

奏爲直隸辦理賑務續收各省捐助銀兩恭摺奏報仰祈
聖鑒事竊查上年直隸各屬水災奇重工賑繁興庫儲極絀經臣
率屬倡捐一面函電各省協助並奏准開辦推廣賑捐藉資接濟
幸賴各省疆臣公忠體

國慷慨恤鄰率同文武各員倡勸集捐墊解鉅款俾濟急需已將
上年七月起截至十一月底止收過本省外省官紳商民捐項奏
報在案茲查自上年十二月起至本年三月底止除大學士臣張
之萬前浙江巡撫任道銓福建藩司劉樹堂糧儲道陳鳴志鹽法
道龍錫慶前福建試用道傅廣日本橫濱中華會館董事譚國柱
等津商黃昭章江西臨江府知府王之藩廬陵紳士胡光鈞新建
縣職員段崇如職員何錫岳蔡國楨朱葆成安徽節婦劉李氏天

津府知府鄒振岳龍門縣紳士司雲龍新嘉坡紳士吳進卿等共捐銀三萬七千兩業經先後奏請獎敘建坊外續經臣倡捐並收到各省將軍督撫及代辦順直賑捐各局暨本省官紳商富捐解直隸賑銀共八十五萬八千三百十二兩二錢八釐業經飭局兌收隨時撥放本年春賑需款正急兼之修濬各河培築各隄以工代撫用項浩繁均須及時籌辦幸賴各省竭力籌助源源接濟俾春撫春工得以分投興辦窮黎均沾實惠保全甚多所有官捐各款仍准照章移獎子弟其餘或由各省自行請獎或由直查取捐生履歷彙案咨部請獎以示鼓勵其三月以後收到捐項俟賑務告竣連同棉衣米糧數目再行奏報外所有本年三月以前續收各省賑捐銀數理合恭摺具陳伏乞

皇上聖鑒敕部立案謹

奏

再請優卹吳毓蘭片

光緒十七年七月初二日

再原任直隸天津道吳毓蘭前於光緒八年十二月據天津紳士王恩淮等臚陳政績又於九年二月據淮軍統將吳長慶等列敘戰功先後由臣奏請照原任臬司丁壽昌積勞病故例從優議卹並將事蹟

宣付國史館立傳於揚州建立專祠天津附祀曾國藩專祠奉

旨允准欽遵在案旋經吏部以核與丁壽昌議卹之案不符奏請更正鈔奏咨會前來臣查吳毓蘭自同治元年與其兄記名道吳毓芬募立華字營隨臣東下轉戰蘇浙殲克名城吳毓芬假歸該員卽代統所部四年東豫擒氛方熾日謀回窺臣令該員駐防揚州一帶六年諸軍會剿大捷於山東之濰光擒首賴汶洗突圍南趨追剿各軍皆在賊後該員率眾迎擊乘大風雨血戰一晝夜生

獲賴汶洸東擒遂平擊擒中惟賴汶洸爲粵匪餘黨蹂躪南北十數年各盜奉以爲魁其黨皆百戰之餘剽悍無敵沿江各城聞其將至一日數驚忽聞渠魁就擒中外詫爲奇功江淮之間人心始定前於肅清東擒案內曾將戰蹟詳細奏陳至該員前後所著戰功及在天津道任內政績疊經先後

上達久在

聖明洞鑒之中查臬司丁壽昌在任病故經臣奏奉

諭旨照軍營立功後積勞病故例從優議卹吏部以久離軍營改照承辦軍需積勞身故例復經臣援照原任臬司劉盛藻成案奏請仍照軍營立功後積勞病故例從優議卹奉

旨著照所請該部知道欽此仰見

聖朝軫念勞臣有加無已凡在將士欽感同深吳毓蘭曾統一軍

屢當大敵其戰功與丁壽昌等相埒而生擒逆首克竟全功實爲東南大局所關尤非尋常戰績可比身後蒙

恩建祠立傳所得

恩數與丁壽昌同一優異視劉盛藻固已過之而卹廕之例猶格

於部議未能一律邀

恩恐非

朝廷追懷前績甄錄靡遺之意茲據淮軍將領葉志超等聯名呈請合無仰懇

天恩敕部將原任天津道吳毓蘭仍遵前奉

俞旨照軍營立功後積勞病故例從優議卹出自逾格

恩施理合附片陳請伏乞

聖鑒訓示謹

奏

荒地旗產升科摺

光緒十七年七月二十二日

奏爲查出順直各項荒地並旗產升科頃畝銀數恭摺奏報仰祈
聖鑒事竊查順直各屬無糧黑地官荒民荒私墾隱種者爲數猶
少其旗圈地畝迷失多年無租無糧之地幾於接陌連阡更有旗
產一項從前旗人私自典賣民人私自承種年代久遠輾轉多手
無從究其來歷自兩次弛禁交產以後屢飭首報升科苦於吏胥
勒索勘辦稽延相率觀望查辦終無起色近年勢豪土痞藉端挾
制而隱種之戶多爲若輩魚肉經界不正獄訟繁興旗民因之交
困戶部洞悉此弊光緒十三年三月酌擬順直各屬議租議賦章
程聲明若不因時制宜恐
畿輔數千頃公私地畝租賦全歸無著奏准嚴飭各州縣遵照辦
理臣因事關全省利害必須妥慎籌辦方可推行盡利當經斟酌

民情事理酌量變通辦法期與部章民隱兩不相妨咨部核准飭令各屬自十五年五月起一體實心查辦並嚴禁書役索擾留難一洗從前銅習小民方樂於從事紛紛首報多而且速查勘明確即行議定租賦咨部頒照收執旋准部咨光緒十五年十二月二十八日奉

上諭嗣後宗室八旗京屯田產無論老圈自置永遠不准賣與民人至從前民置旗地已經升科報部者仍准執業其已投稅升科尚未報部及已經交產有契尚未投稅升科者均自此次降旨之日起予限六箇月一律升科等因欽此仰見

聖主於顧念根本之中仍寓體恤閭閻之意凡在臣民同深欽感即飭各屬出示嚴禁規復舊制以保旗人生計其民置旗地在奉旨以前催令一律升科嗣因旗產限滿尙有多案未結奏明於定

限六箇月之外再行展限一年俾得澈底清查以裕賦課現因正
展各限截至本年五月底屆滿據藩司裕長將查辦各項荒地並
旗產升科頃畝銀數開摺詳報前來臣查光緒十五年五月起至
是年年底止查出順直各項地畝原報三千餘頃內除順屬各州
縣詳辦未結新舊各案其地一千一百五十七頃餘畝上草房十
六間莊窠十二塊已由司詳經府尹臣自行飭辦外計由司造冊
達部核准頒照官荒旗荒民荒地一千二百八十四頃一十畝
零每年應徵正耗銀五千四百五十八兩零旗產地一千一百四
頃九十二畝零其徵正耗銀三千二百六十八兩零又自十六年
正月起到十七年五月底止查出直屬其造冊達部核准官荒旗
荒地荒其地一千五百四十一頃四十二畝零每年應徵正耗銀
六千八百三十七兩零旗產地四百六十頃五十一畝零其徵正

耗銀九百二十五兩零統計查出各項地畝除由順天飭辦一千一百五十七頃餘畝不計外實由司造冊達部核准官荒旗荒畝荒旗產其地四千三百九十頃九十五畝零每年其徵正耗銀一萬六千四百八十八兩零第一百十六年起開時十八月之久升科地畝雖有二千餘頃究不及十五年之首報踴躍報出旗產爲數更屬無多推原其故委因上年夏間旗產畝限後大雨決旬各河漫決順直災歉州縣計有九十八處地畝被水淹佔刻下尙有未經開復者無論老荒新墾不便催令升科各牧令籌辦賑撫招集流亡並有應修河隄要工實亦不遑兼顧不特荒地未報者尙多卽旗產已經報稅尙未升科及交產有契尙未投稅者正復不少況有外出水歸之戶禁令未盡周知若因已逾期限不准升科勢必隱匿不報租賦轉致無著且恐捏報黑地流弊滋多臣督飭藩

司察酌情形應請自此大限滿後如有首報升科查係置買立契年月實在此次禁止交產以前證據確鑿並非無故不報者仍准隨時升科若係無故不報及有捏報荒地情弊一經查出卽照部章同各項荒地一律追繳花利撤地入官從嚴懲處庶良民得所措手奸民亦知畏憚一切隱匿影射之弊不禁自除實於

國課民生兩有神益至該管各官察出隱地二十頃以上例得按畝紀敘其清出旗地在一百頃以上依限納稅升科按照戶部定章准其保奏請

旨酌加優敘今順直各屬查報地畝較多之各州縣盡心清理有裨正供未便沒其微勞仰懇

天恩俯准等查照例章奏獎以昭激勸除將地畝銀數清摺咨部外理合會同兼管順天府府尹臣祁世長順天府府尹臣胡聘

之恭摺具陳伏乞
皇上聖鑒訓示謹
奏

威海添建學堂片

光緒十七年七月二十二日

再海軍人材以學堂爲根本北洋現有各師船需才甚殷非多設學堂不足以資造就堂內學生課程有洋文洋語史論算學海圖星象測量格致諸務必須研究數年方能略窺蘊奧及挑入練船又須練習風濤沙綫帆纜輪機鎗械雷礮各藝計非十年之久不克畢業是則水師學堂之設實爲海軍切要之圖僅止天津一堂儲材無多恐難敷用經北洋海軍提督丁汝昌於威海衛之劉公島擇購民地添建水師學堂該處地接海濱間見更多閱歷光緒十五年遞派委員司事督催工作月給薪糧銀七十八兩自是年九月起文其選募教習學生援照天津學堂成規酌定經費撙節試辦計共設員司教習學生書識號鼓夫役人等五十九員名月需薪膳伙食公費等銀五百九十三兩六錢卽於十六年四月十

六日起支又建造學堂大小房屋六十三間共用工料銀九千五百二十八兩有奇購地銀四百二十一兩有奇製備書籍器具銀九百十九兩有奇統由北洋海軍經費項下動支應俟彙案造報以後應需書籍及考試學生派上練船暨添募學生擴充辦理一切活支之款難以預計原定經費如有不敷再遵照海軍衙門奏定章程月請添撥據天津海防支應局司道開具員名餉數清單詳請奏咨前來臣覆核所支經費均係必不可少之款除分咨海軍衙門戶工部立案外理合繕單附片具陳伏乞

聖鑒訓示謹
奏

謹將洋創設威海水師學堂酌派委員教習學生司事書
識號鼓夫役人等員名餉數繕具清單恭呈

御覽

計開

管理學堂委員一員月支薪水銀五十兩

洋文教習一員月支薪水銀四十兩

漢文教習二員各月支薪水銀二十兩共四十兩

學生三十六名各月支伙食銀三兩六錢養贍銀四兩其月支銀

二百七十三兩六錢

司事一名月支薪水銀十六兩

書識二名各月支辛工銀九兩其月支銀十八兩

洋號手一名月支口糧銀八兩

洋鼓手一名月支口糧銀六兩

夫役十四名各月支口糧銀三兩共四十二兩

公費月支銀一百兩

以上五十九員名共月支銀五百九十三兩六錢照天津水
師學堂向章加閏不扣建

曹克忠起病片

光緒十七年七月二十二日

再前廣東水師提督曹克忠於光緒六年二月間奉

旨交臣差遣委用十年法越事起近緩辦防經臣奏令招募津勝

六營駐紮山海關旋蒙

簡放廣東水師提督十一年事定遂將防營遣撤觸發舊傷未能

赴任願請開缺蒙

恩允准近日調理漸愈臣於接見時細加察看精神智慮不減從

前查曹克忠爲原任將軍多隆阿所部健將屢當大敵卓著戰功

資望最深謀勇兼裕方今整飭武備宿將漸稀曹克忠精力未衰

閒置殊爲可惜該提督籍隸天津本係

特旨交臣差委於畿防將領氣誼素孚沿海各處情形尤熟臣已

勸令就近起病仍在海防軍營籌助一切實於營務地方均有裨

益該員歷任甘肅廣東提督遇有各省提督缺出照例由軍機處請

旨簡放應請俟得缺後再行

陛見理合附片具陳伏乞

聖鑒訓示謹

奏

郭嵩燾請付史館摺

光緒十七年七月二十二日

奏爲已故大員學行政績卓然可傳據實臚陳懇

恩宣付史館恭摺仰祈

聖鑒事據湖南在籍紳士前國子監祭酒王先謙前貴州思南府知府周開銘前甘肅甯夏府知府黃自元員外郎曾廣銘等聯名呈稱原任兵部左侍郎郭嵩燾由道光二十七年進士改庶吉士丁憂回籍咸豐初粵匪犯湖南以守城功議敘並

命在籍幫辦團練時故大學士曾國藩守制家居奉

命辦理湖南團練遲回未出該侍郎馳至其家陳說大義國藩感動始起視師方經費奇絀該侍郎親行各州縣勸捐集餉創議舉辦通省鹽釐捐局手定章程旋帶湘勇援前安徽巡撫江忠源於南昌解圍後奉

旨授職編修在江西守城日爲江忠源言賊踞江路宜製造戰船以備攻勦忠源聽其議屬爲草奏得

旨允行其後曾國藩等卒用水師成肅清江面之功七年回京當差八年入直

南書房九年隨親王僧格林沁赴天津辦防敘功

賞戴花翎旋

派赴山東查辦稅務十年假歸同治元年

特授蘇松糧儲道旋巡兩淮鹽運使時運庫存銀不及四萬欠解江南糧臺及安徽協餉甚鉅到任後詳請各營配鹽必由運司掣驗提督李世忠擁重兵行私鹽莫敢詰問至是緝獲並沒其船鹽運大暢在任一月欠餉全清續運銀米以濟皖軍而江南大營支運營鹽隨時應付移交後存銀尙二十餘萬其綜理精密如此旋

賞三品頂戴署理廣東巡撫粵中盜船林立師船乏餉與盜相比該侍郎仿造三板戰船守東江口之石龍攻破盜村次及北江西江盡斂其船歸官歲省餉需十數萬粵釐設卡多弊端入不過七十萬自裁汰歸併歲增至百四十餘萬又別立籌餉庫以儲捐餉各款兩歲亦積至二百餘萬此皆實政可紀者五年開缺回籍十三年

特召赴京光緒元年補福建按察使內遷兵部左侍郎在總理各國事務衙門行走二年充出使英法國大臣遣使之初人皆視為畏途

朝命特以充選在西洋三年考究利病知無不言英國於南洋開闢新嘉坡一島閩廣人流寓貿易工作者不啻十萬悉受制於英官該侍郎據約力爭於英外部乃設中國領事官英埠設華官自

此始自是華人得官保護遇事不至見陵其品望最爲西人敬服
去任後猶稱頌弗衰差旋抵滬猝染重病陳情乞休時以不能趨
叩

闕廷爲憾每遇交涉艱危旁皇形色嘗言冀多得通知中外事體
之人轉相開諭他日或收其用其秉性忠誠繫懷時局如此生平
廉潔自矢任運司時裁汰規費出使三年開報公款僅薪水房租
兩事其他皆自支銷歸後家無餘貲惟以書院修脯自給文章學
問爲後進所宗生平述甚富所著禮記質疑四十九卷業已成
書體大思精爲海內通儒推重茲於本年六月十三日在籍病歿
除由湖南撫院奏報外以臣於該侍郎事蹟知之最悉懇請奏乞
恩施專差航海呈遞前來臣查已故侍郎郭嵩燾早從軍旅游歷
封圻晚使絕國行能功績久在

聖明洞鑒之中臣早歲卽與相識其後同官京曹同在兵閒及至江蘇又與共事逮該侍郎充出使大臣與北洋交涉尤繁故其志行知之獨詳實有不吝泯沒者臣曾國藩初以憂歸屢奉

詔旨敦促該侍郎以事關大局不容預計利鈍手書而請至再至三臣曾國藩感其至誠後每與臣言未嘗不歎其篤摯惻惻能任事也左宗棠初中危獄以該侍郎之力得全遂至顯用戡定以來論武功者盛稱曾國藩左宗棠而二臣之起則該侍郎實推挽之至創釐捐以濟師練戰船以勦賊尤爲兵餉大政所係皆事成而不居其功當時將帥爭欲得以爲重自以侍郎臣乞退出處宜嚴雖於胡林翼之書招李續宜之奏調並辭不赴及臣治軍東下求賢於曾國藩專疏薦達蒙

恩特授蘇松糧道該侍郎始起赴官甫及一年超署廣東巡撫時

廣東吏治軍務釐務積敝之後該侍郎感激

知遇自矢澄清履任之初吏置將吏百城肅然歲辦餉項贏百餘萬而商民不知擾累尤爲人所難能平生於洋務最爲究心所論利害皆洞入精微事後無不徵驗前後條列各件外延多不盡知病歸後每與臣書言及中外交涉各端反復周詳深慮長言若愛在己迄今展閱敬其忠愛之誠老而彌篤且深歎不覓其用爲可惜也該侍郎初官翰林卽以文章負天下重望於學無所不通而尤善言禮曾國藩嘗謂先王修己治人經緯萬彙惟在於禮故於國朝儒生通顯者獨推故尙書秦惠田王引之該侍郎所著禮記質疑一書折衷羣經淹貫三禮括歷代制度之大得諸家訓詁之通實兼秦惠田王引之二家所長卓然禮學大師爲當代所僅見道光初故大學士阮元督粵始作學海堂以課士及該侍郎爲巡

撫增設條教巔門之學成就尤多與士稱爲百年以來兩人而已
伏念該侍郎服官中外歷著勤能

聖朝軫念前勞自有

恩卹之典至其政績學術卓絕可傳應請

旨宣付國史館立傳並

飭下湖南巡撫錄其所著書咨送史館以垂不朽伏讀乾隆十七

年二月

上諭以故禮部尙書韓莢碩學績文加恩追諡又乾隆三十四年

四月

上諭原任刑部尙書王士禎積學工詩從前未邀易名之典宜示
褒榮以爲稽古者勸各等因欽此咸豐十一年曾國藩爲前太常
寺卿唐鑑代遞遺摺以其宿學忠敬籲請

特旨賜諡蒙

恩允行仰見

先朝激勵儒修一時傳誦以爲文臣之至榮郭嵩焘經術政績視韓莢等殆尤過之可否

特予褒嘉以勸學行出自逾格

恩施非臣所敢擅請所有已故大員事蹟可傳請
旨宣付史館緣山理合恭摺具陳伏乞

皇上聖鑒訓示謹

奏

電報洋教習請獎片

光緒十七年七月二十二日

再各國員弁爲中國辦事出力歷經奏蒙

賞給寶星茲查有電報總局丹國洋員博來天津電報學堂教習丹國人璞爾生英國格林海軍書院教習藍博德海晏輪船管駕英人安得祿歷辦各項差務均能實心襄助著有勞績合無仰懇天恩俯准將博來比照各國總教習例

賞給二等第三寶星璞爾生藍博德安得祿三員比照教習例賞給三等第一寶星藉資鼓勵如蒙

允准所有二等第三寶星一面三等第一寶星三面均由臣照式製造仍請由總理各國事務衙門填給執照以憑轉發除咨會總理衙門外理合附片陳請伏乞

聖鑒訓示謹

奏

北洋電綫報銷摺

光緒十七年七月二十八日

奏爲歷年設立北洋沿海一帶並奉天邊門等處電綫動用經費彙案報銷恭摺仰祈

聖鑒事竊查北洋電報自天津至北塘口前已將商綫改歸官綫以通軍報其由北塘口東出山海關分達營口旅順並奉天鳳凰城等處均係沿海沿邊扼要之區防營環列表延數千里均未設綫文報每虞遲滯光緒十年春因法越多事海防喫緊北塘口至山海關一帶爲

京畿門戶布置最關重要經臣奏准自北塘接設電綫東至山海關止飭由電報官局遴員帶同洋匠履勘興工於是年四月開辦至六月底止工竣計設電報五百三十五里實用經費銀三萬一千九百六十一兩零均在海防經費項下陸續撥發是爲北洋設

立官綫之第一案又十年七月間疊准總理衙門來電山海關至營口旅順沿海陸路應設旱綫並欽奉

諭旨速辦等因當經奏明在浙江典商原領練餉成本項下除購糧運京平糶外尙存銀七萬九千三百餘兩儘數撥充設綫經費復奏撥長蘆欠解奉省餉銀二萬兩湊濟工用前

盛京將軍慶裕旋以奉天省城至營口亦應添設電綫奏明由奉辦撥工款銀一萬兩咨經臣派員併案勘辦自是年七月興工至次年三月工竣計由山海關東抵營口北達瀋陽南達旅順並永平府屬之昌黎樂亭等處其設電綫一千七百七十八里實用經費銀十萬七千三百十六兩零又撥付煙臺至威海衛電工料物銀一千九百九十五兩零除收尙不敷銀七兩零卽由威海衛電工經費內撥補清款是爲北洋接設官綫之第二案又十一年籌

辦朝鮮善後事宜經臣奏准由瀋陽東出鳳凰邊門徑抵義州一路增設電綫在江海關出使經費項下撥銀四萬兩應用是年七月興工至十月工竣計設電綫六百一十里實用經費銀三萬四千六百五十二兩零又撥付煙臺至威海衛電工料物銀五千三百三十七兩零尙餘銀十兩零是爲北洋接設官綫之第三案又十三年因北塘東達奉省各路電桿僅挂一綫遇有要報每至耽延且天津至北塘電桿年久眇朽必須換桿加綫傳遞方能捷速並因威海衛創設水師口岸應由煙臺至威海衛接設一綫計程一百六十里除將前辦旅順及鳳凰邊門電工兩案餘料儘數撥用尙估需經費銀二萬八千兩卽經咨部立案於是年三月開辦至八月工竣實用經費銀三萬五千二百九十五兩零計收過海防經費銀二萬八千兩又收旅順鳳凰邊門兩案餘料值銀七千

三百三十二兩零除用尙餘銀二十九兩零是爲北洋接設官綫之第四案疊經電報官局將各案用過工料細數先後咨由海防支應局彙核四案其收過銀二十萬九千二百六十五兩零實支銀二十萬九千二百二十五兩零內應歸戶部核銷銀二萬七千一百二十九兩零兵部核銷銀三萬三百四十四兩零工部核銷銀十五萬一千七百五十一兩零除實支外仍餘銀三十九兩零歸入光緒十五年北洋經費項下列收造報以清案款分晰造冊詳請奏銷前來臣查北洋本無電報自光緒十年創辦以後接續經營周環渤海直達朝鮮計設綫路三千餘里內而調度防軍外而保護藩屬呼應靈捷若在戶庭有神軍國要政其電綫經行之處西路永平一帶則海岸河流水深開阻東路鳳凰門一帶則危崖峭壁刊鑿爲難加以沿途曠莽工夫難招締造艱辛不無糜費

欽飭承辦各員力求撙節安速程功首尾四年次第告竣所需經費每里約僅六十兩左右此項工程並無例案可循一切用款臣覆加確核委係實用實銷毫無浮冒除將清冊分咨戶兵工部外理合恭摺具

奏伏乞

皇上聖鑒敕部核銷謹

奏

請將張曜洋價摺

光緒十七年七月二十八日

奏爲代陳已故撫臣遺書恭摺仰祈

聖鑒事竊臣接據升任山東藩司福潤來函以已故撫臣張曜於

病篤時口授遺書屬臣代

奏臣查閱書中所言山東沿海臺礮尙未修備深以爲憾未復詳

言新疆銷案疊經部查本年始奏奉

恩允而部臣又令裁營陸續歸補惟欠款七十四萬七千餘兩皆

借自洋商訂明納息卽裁一二營月餉僅數月息之用鉅款終於

無著焦慮成疾以至不起長負

聖恩望采遺言詳奏

天聽俾不至失信遠人貽口舌而辱

朝廷則九原亦可瞑目等語並將原奏部文鈔錄由該升司函遞

前來臣惟該故撫

臣張曜

前因墊發所部嵩武軍餉項展轉挪借

華洋各款事之原委

臣初未與聞茲據其遺書及鈔來奏稿部文

始得詳加檢閱該故撫歷陳各節自屬實在情形仰蒙浩蕩之

恩迴異尋常之例至部臣所慮晉豫兩省欠餉難以籌解亦是深

知外間虛實之言改令以裁營陸續歸還原非得已惟查該故撫

所借各款以德國商人德華泰來兩處爲最多向來借用洋款俱

係豫定年限攤勻本息如期歸還斷難延緩該故撫原以請款有

著庶可設法騰挪既經部議裁營歸償已覺無從措手今又身歿

更無主持清理之人轉瞬洋債屆期應付少遲定滋口舌其有關

於

國體者甚大嵩武一軍本係百戰精銳分紮山東沿海及南北要

隘現在新失大將人心易搖且須籌辦膠州煙臺等處海防一時

亦難裁遣況以一二營有限之月餉指還刻不容待之鉅款緩不濟急徒託空言伏念該故撫歷著勩勤久荷

聖明垂鑒其生平操履廉介殊爲人所難能治軍服官垂四十年曾無寸產一椽之殖既歿幾無以殮將吏環視感泣失聲持己之嚴一時所信身後猶以因公虧款上累

朝廷帷蓋之施此誠瞑目傷心不能自釋者也臣昔與該故撫共事勦捻患難相從念其垂死遺書千里相託至此項欠餉案牘炳然曾荷

特旨俞允未敢壅於

上聞合無仰懇

天恩飭下總理各國事務衙門會同戶部妥議籌款歸還以全大局新任撫臣福潤與該故撫同官日久氣誼素孚於所借洋款數

日限期必能深知詳細將來還款時自應

飭山該撫臣就近督同嵩武軍經手借款之員認真清理俾臻安

慎謹將該故撫遺書鈔呈

御覽理合恭摺代陳伏乞

皇上聖鑒謹

奏

覆奏停購船械裁減勇營摺

光緒十七年八月初八日

奏爲遵查部議北洋停購船械裁減勇營情形據實覆陳恭摺仰

祈

聖鑒事竊臣欽奉光緒十七年四月二十五日

寄諭戶部奏酌擬餉辦法一摺等因欽此當卽恭錄轉行欽遵查照逐細籌議茲據各司道將領等詳覆前來臣查部議外辦四條除鹽商捐輸督飭運司勸商量力報效片片具奏土藥稅釐俟開辦後儘數解部外至北洋向來購買船械本無專款存儲沿海駐紮勇營又與他省迥異謹將詳細情形縷析爲我皇上陳之原奏南北洋購買外洋鎗礮船隻機器暫行停購兩年卽將所省價銀解部充餉等語查北洋厯購鐵艦快船均係奏明

奉

旨由部月籌專款不在歲支北洋經費之內其兵船礮臺應配礮
械均於創辦時估計併購前奏定海軍章程內載明若購大批軍
火需款較巨專案咨商海軍衙門辦理故額定歲支款內並無購
買外洋鎗礮一項是北洋購買船隻鎗礮均係另請籌撥從無存
儲備用之款今卽停購仍屬無銀可解至購買外洋機器約分兩
大端一爲從前所無新議創購之件一爲原來所有隨時添配之
件其創購者苟非海防急需自當暫停惟歷年撥定經費各省解
不足額額支之款尙屬不敷此則雖暫停購仍無餘款可以騰挪
若隨時添配之件如艦艇隔廠原有各機器俱係西洋新式靈巧
異常機關極脗用久易敝各口所設魚雷水雷尤爲攻守利器其
雷筒電信等件遇有缺壞若不添配遂成棄物各廠局輪機器具
運動倍繁損壞尤易儼拘於停購二年之議任其缺損一物壞則

全機俱停一器乖則全船半廢製造闕則軍實立匱操防缺則攻守無資積年之功墮於一旦所省甚微所關甚鉅此則萬難停緩然統計每年所費不過十萬金亦無數十萬之多此查明北洋船械項下並無餘款可解之實在情形也又原奏各省營勇原額恐難皆足能有八九成卽稱上選令將馬步勇營各就所存限一年內裁足一成等語查直隸現存勇營淮軍分紮沿海各處東至奉天之旅順口大連灣渡海而南至山東之威海衛皆北洋海防最爲緊要之地自來湘淮軍得力實由勇數足額足則力厚當用兵時常以一營分紮兩壘近年因備外患修築礮臺亦多以一營分紮兩處則人數斷不能少所用鎗礮全係西洋精利之器凡操後門礮自礮目以至勇丁皆有應管之物應做之事缺一不可演鎗則分行布陣悉照西法進退分合均有一定之數亦缺一不可准

軍調防

畿輔逾二十年平時疏渠屯田築臺修壘及歷年修濬河工如黃漳永定下游南北連減河各工見於奏牘者幾無虛日藉非兼資勇力勞費殆不可勝計直隸沿海以至東奉各口礮臺相望俱仿照西洋新式而旅順威海大連灣等處臺工鑿山填海致力尤艱藉非全用勇力其勞費尤不可勝計論前日之戰守則一勇實得一功之用論平時之工操則一勇實兼兩勇之用部議勇額八九成卽稱上選此論他處營制或未可知若淮軍則自來所未有蓋按冊可稽隨時可驗者也光緒六年正月奉

旨飭裁各省防營以直隸須辦邊防

特諭毋庸議減卽十年戶部議開源節流各條內亦蘊及內地防勇而於海防各營均未議及誠以三輔本根重洋門戶

廟謨遠燭廷議僉同長慮周防原不可以外省及內地各營爲比而六年防俄十年防法徵調客軍添募新軍旬月之間

詔書疊下則近畿兵力並不甚足久在

聖明洞鑒之中際茲費絀用繁疆臣誼其時艱但使勉可支持何敢不力爲其難精紓餉力臣自調任直隸以來歷年裁勇就餉之案非止一端其最鉅者光緒十一年特奉

懿旨飭各省裁勇以增旗兵加餉當時新募勇營一律裁減歲節部餉九十四萬八千兩實爲大宗自十一年裁定以後未增一營次年四月間

醇賢親王巡閱北洋覆

命具疏亟稱陸軍將領雖屬可恃猶以分布各隘力量未厚爲言其時威大兩海口尙未設防今則均已移軍填紮布置愈廣兵力

愈單現又須遵

旨續籌膠州澳煙臺等處防務將來如何分撥屯駐尙待妥籌此卽未能添募何可更議裁撤今若就各營統裁一成每歲所省無多而有關於畿防海防及營制軍實者甚大此查明北洋防營現難裁減之實在情形也竊維北洋拱衛

畿輔環帶大洋近年創辦海軍防務尤重自來設防之法必須水陸相依船艦與陸軍實爲表裏北洋現有新舊大小船艦其只二十五艘奏定海軍章程聲明俟庫款稍充仍當續購多隻乃能成隊而限於餉力願大難償

醇賢親王巡閱疏中已極言師船兵力尙單全恃陸軍礮臺以爲固今則船艦旣暫停添購防營更未便遽裁伏讀本年五月初八日

上諭海軍關係緊要必須精益求精仍著督飭各員認真經理以期歷久不懈日起有功等因欽此各營將士傳誦

詔書莫不馳驅感奮膠煙兩處特奉

諭旨添築礮臺難更停緩臣此次出洋巡視各口親見弁勇工作勤苦胼胝黧黑備極辛勞臺工尙多未竣臣與前撫臣張曜徧加拊循方蒙激勵之

恩忽有汰除之令懼非

聖朝慎重海防作興士氣之至意也詳閱部臣所議既曰自相商定又令察酌情形固已深知外間事勢各殊斷難一律現經再三籌度目前餉力極絀所有應購大宗船械自宜照議暫停至裁減勇營一成應俟各處臺工竣後再行酌辦惟值部庫奇絀需款正殷直隸雖係缺額之區自應與各省分任其難勉籌涓滴之助容

當督飭漕運兩司無論何款竭力撙節勻撥一俟集有成數再當隨時奏明辦理所有遵查部議北洋停購船械及裁減勇營實在情形理合恭摺覆陳伏乞

皇上聖鑒訓示謹

奏

史克寬請開復片

光緒十七年八月初八日

再據河間縣在籍紳士前雲南陸涼州知州劉啟同等聯名呈稱
滹沱河爲直隸五大河之一猛悍不受隄防上游深武饒安下游
任雄霸保文大十餘州縣均受汎漫之害而河間適當其衝往年
每遇盛漲農田盡成澤國自光緒七年前任清河道史克寬相度
形勢始於獻縣新闢減河使滹沱仍歸子牙故道達津入海從此
十數州縣始免沈災迄今十年河流順軌農民復業追維利賴之
澤實該前道之功前於被議去官時紳民等曾於十方院建立去
思碑以誌愛戴茲聞溘逝感泣同聲紳等追念前勞合詞籲懇奏
乞

恩施開復原官以慰眾望等情並據任邱等縣紳民聯名呈請由
該地方官具詳請奏前來臣查史克寬久從淮軍勦辦粵捻轉戰

南北卓著勦勞其在清河道任內因升任太常寺卿徐樹銘查辦
獻縣河工以該故道所挑新河水勢不順致南岸各村雨後被災
奏請交部議處旋經部議革職臣查滹沱下游本歸子牙河自同
治七年北徙漫入古洋河河身淺窄橫流四溢於是深州饒陽獻
縣河開肅甯任邱雄縣保定霸州大城文安十餘州縣歲被漫淹
民困已極光緒七年臣派該故道前往勘度在獻縣開挖滹沱新
河挽歸子牙故道然後沿河州縣始登衽席至南岸各村地居窪
下向被水患非自開河以後始然且斷不能僅顧一隅數十村莊
而置上下游十餘州縣民生於不問徐樹銘奏請改道實非通籌
全局之言嗣後疊據各州縣紳民赴臣及府尹都察院衙門並各
該道府州縣紛紛呈訴俱謂新河有益改道有害旋奉
旨交臣議覆仍照史克寬所開河道辦法至今便之其詳細情形

臣於七年奏開新河及九年十年疊次覆奏案內並已縷析上聞是該故道辦理並未乖方被參不無冤抑茲據該紳民等呈詞懇切足見道愛未泯公論在人合無仰懇

天恩俯准將已故革職清河道史克寬開復原官以順輿情而彰勤績出自

懇施逾格理合附片具陳伏乞

聖鑒訓示謹

奏

海防練軍請銷摺

光緒十七年八月十九日

奏爲查明天津海防練軍光緒十六年分收支各款照章造冊請銷恭摺仰祈

聖鑒事竊據天津支應局司道詳稱天津練軍及大沽葛沽北塘海口各礮臺防營並雲字營馬隊營務處小隊應需餉項向由津海關六成洋稅招商局稅洋藥釐捐東海關協餉長蘆鹽斤復價正雜課各項下隨時籌撥樽節支放前因東海關六成洋稅湊付洋債無款協解歷在天津釐捐項下動用經部覆准業將光緒十五年以前收支款目疊次奏咨准銷在案嗣因津海關攤還洋款津防月餉解不敷放復將奏明留充防餉之張獨多三廳押荒銀兩儘數提用至應支餉乾薪糧等項並大沽等口臺礮經費以及設局辦公租賃民房添置帳棚旗幟號褂采買製造軍火器械悉

照奏定章程歷年准銷成案核實支放茲造具光緒十六年分收支細數清冊詳請

奏咨前來臣逐加覆核自光緒十六年正月起至年底止舊管存銀一萬五百八十五兩零新收各款並本案扣收平餘銀三十九萬六千四百五十六兩零開除支款悉照定章毫無浮濫應歸戶部核銷銀三十七萬一千六百十六兩零工部核銷銀三萬六千二百五十七兩零合共銷銀四十萬七千八百七十三兩零實在不敷銀八百三十兩零以光緒十六年係屬有閏之年入不敷出由局設法借墊業於十七年所收月餉內撥還歸款應俟下屆銷案內登除造報至奉部核准歷年墊支不敷銀二萬一千一百七十八兩零仍於冊內列報應俟另案核辦後再行開除所有光緒十六年天津海防練軍收支餉銀請銷緣由除清冊咨部外理合

恭摺具

奏伏乞

皇上聖鑒敕部核銷謹

奏

吳毓芬請卹片

光緒十七年八月十九日

再按察使銜江蘇題補道吳毓芬於同治元年隨臣率師赴滬綜理營務旋募立華字營航海援常熟先克福山解城圍調防吳江縣時大軍壁蘇州城下浙賊數萬來援徑撲吳江沿塘築壘合圍迭擊吳毓芬誓眾堅守相持逾月賊不得過程學啟以所部開軍來會戰於南門吳毓芬開西門出賊背夾擊之擒斬偽貴王等賊目四十餘名追至平望伏屍蔽野賊援既絕蘇城勢孤未幾收復旋進軍浙境克平望黎里等鎮規取嘉善縣據賊偽鄧王陳占榜送質約降吳毓芬輕舟入城受之料簡精銳編爲華字左右暨新副水師營餘眾數萬資遣歸里遂進圍嘉興府城嘉興守賊極悍程學啟攻北門被創不能進吳毓芬由東路進克六里街合歡橋吳涇橋諸隘奪賊所築月城外石壘以巨礮壞城樓及雉堞數十

丈吳毓芬身先將士踰濠拔蒺藜倚雲梯蟻附而登開軍亦自北

門入以先登功

賞給禦勇巴圖魯名號調防溧陽縣先是溧陽金壇賊酋李世賢
林得英赴援金陵守賊以城降吳毓芬至溧十日二酋驟回敗鮑
超所部霆軍千人於金壇竄至南渡吳毓芬念溧陽爲巨酋巢穴
新附反側未定若內外合則全局危乃夜出兵抵南渡預設伏令
降人習賊號者易服入賊壘縱火賊大擾縱兵奮擊斬林得英及
偽天將黃有才等數十人李世賢僅以身免餘眾皆殲城內降目
慄伏卽日散遣其眾四萬人調防長興縣謀知湖州賊謀竄廣德
吳毓芬擬先取泗安鎮扼其要路而橋道已爲賊斷橋南賊營連
屬進戰不易該道簡精卒舁小舟夜出黎明至橋牽舟徑渡驟踏
賊營循河追擊直抵泗安賊出迎力鬪將士奮死直前肉薄登壘

湖州大股奔至見輜蓋易大駭卻走縱兵兜擊無一脫者捷聞奉
上諭吳毓芬一軍進剿破成林橋等處堅壘直偪泗安連克五
營剿辦甚爲得手著賞加按察使銜等因欽此旋調防揚州府進
紮清江宿遷及山東之嶧縣韓莊等處以其弟吳毓蘭分統華字
兩營回防揚州力擒賴汶沈東捻以平先是吳毓芬會攻嘉興時
自冬徂春連旬風雪偏地泥淖積受寒溼至是驟發假歸調治遂
成痼疾馴至不起臣查吳毓芬起自諸生以學行信義著聞閭黨
咸豐中捻首談家寶縱橫廬鳳間吳毓芬謁故撫臣福濟謂家寶
壽州俠士以家陷冤獄非有意作賊也請以單騎招之遂與偕詣
臣軍前隨克復含山巢縣無爲州卒以力戰死事當臣東征之始
方苦兵單其時故兩廣總督張樹聲故廣西巡撫潘鼎新故廣東
水師提督吳長慶前福建臺灣巡撫劉銘傳皆練團勇保衛鄉里

與吳毓芬氣誼素投奉檄往招約與俱來是爲銘鼎樹慶四軍各
致勦閩爲時名將抵滬後軍餉極絀臣令吳毓芬兼綜釐務承積
敝之後極意釐別兩月內多收六七十萬軍食以饒治軍嚴而有
恩與其甘苦人人皆得盡言樂爲致死賊中虛實情偽罔不周知
大小百數十戰未嘗挫衄破賊之日必先資遣難民皆令得所財
幣一無所私迹其生平將才吏才並稱卓絕故雖名位未顯而並
起諸將皆推重之同時大吏爭欲得以爲助惜以病廢未竟其用
然論從征之早力戰之勤勞苦功多實難泯沒而吳江之守嘉興
之克溧陽泗安之戰論功最偉尤爲大局所關追念前勞深堪痛
惜合無籲懇

天恩俯准將吳毓芬照軍營立功後積勞病故例從優議卹並附
祀各省淮軍昭忠祠以彰盛績出自逾格

慈施理合附片陳請伏乞

聖鑒訓示謹

奏

奏明購買鑄鋼機器水腳片

光緒十七年八月二十七日

再光緒十五年五月間據天津機器局司道詳請籌購外洋鑄鋼機器全份擬向英國葛來可力夫葛爾公司格林活各廠分別定購所有價值腳險各項分款開單請示臣因現在請求海防利器外洋長式鋼質礮彈為後膛鋼礮所必需中國無鑄鋼機器不能鑄造無以供操防之用此項機器必應添置仿造以備緩急當即咨會海軍衙門並咨戶兵工部立案一面批准照辦旋准兵部咨開查北洋運腳保險向按一五成核銷今所購鑄鋼機器腳險俱過一五成數應令酌核議定範圍報部再行立案臣復查外洋運華器物其水腳本無一定矧重大器件運送較難所有水腳如照尋常規例洋商不肯裝運其運腳多寡係洋商作主我處不能懸定等情咨覆兵部酌核昨復准兵部咨開前項重大機器既未議

有定數本部礙難核定立案應由該督自行奏明辦理等因臣查外洋水腳各種不同歷年購辦機器有不及一五成者有一成五六至二成四五者先後俱准部咨銷在案如塞們德士及銅鑼鐵柱等重大器件腳險較其本價均一倍有奇此次訂購鑄鋼機器各項重大異常統計運腳保險各費二二成有零核與從前准銷二成四五腳險有減無增實無絲毫糜費且外洋船隻裝載運華物料遇船多貨少之時水腳略減船少貨多水腳立漲且有貪裝輕貨於噸位中取巧者種種情形不能一律卽臣處與洋商交往較多水腳訖無一定亦不能將水腳一項預爲折中定斷致運到時多費唇舌應請旨敕下兵部將前項鑄鋼機器先行立案至機器內重大之件俟收清器件時飭由經購之員與洋商切實核定水腳保險數目不

得稍有含混再行專案報部以憑核辦理合附片具陳伏乞
聖鑒訓示謹

奏

喜昌請建祠片

光緒十七年八月二十七日

再據易州紳士刑部候補員外郎陳崑授等聯名呈稱同治七年
捻首張總愚由晉竄直保定省城戒嚴時各路統兵大臣以易州
爲

陵寢門戶防衛尤重前庫倫辦事大臣喜昌方以協領管帶馬隊
派令率部馳抵易州防堵流氛不驚閭閻按堵追懷前績實不可
忘擬請捐建專祠並請列入祀典地方官春秋致祭以伸報享等
情由該知州容裕詳請具奏前來臣維前任庫倫辦事大臣喜昌
本年在京病歿荷蒙

特旨軫恤有加其事跡戰功久在

聖明洞鑒同治七年剿捻一役湘軍追賊而東淮軍遏賊而南其
初捻蹤飄忽靡常保定以北時虞竄擾該故大臣首率馬隊先至

易州防護

陵寢綏輯地方該處紳民感其保衛之力請爲捐建專祠列入祀典實有合於祭法禦災捍患之義不敢壅於

上聞理合附片具陳伏乞

聖鑒訓示謹

奏

李文忠公奏稿卷七十二